

劉兆祐博士主編
中國史學叢書三編

經
略
復
國
要
編
(二)

臺灣學生書局 印行

劉兆祐博士主編
中國史學叢書三編

經略復國
要編
(二)

臺灣學生書局印行

經略復國要編——四卷附錄二卷／（明）宋應昌撰——影

印本——臺北市：臺灣學生，民75

50,1193面；2冊，21公分——（中國史學叢書第三編，第二輯；13）劉兆祐主編

據國立中央圖書館藏明萬曆間原刊本影印

1.中國一史料 I（明）宋應昌撰 II集叢名 III劉兆祐主編
618/8658 V.13

第二輯 中國史學叢書三編

劉兆祐博士主編

國立中央圖書館藏本

經略復國要編——四卷附錄二卷

撰者：明·宋應昌

出版者：臺灣學生書局

本書局登記：行政院新聞局局版登業字第一一〇〇號

發行人：丁文治

發行所：臺灣學生書局

臺北市和平東路一段一九八號
郵政劃撥帳號〇〇〇二四六八八號
電話：三二一四一五六・三二一〇九七

香港總經銷：藝文圖書公司

地址：九龍又一村達之路三十號地下後座
電話：三一八〇五八〇七

中華民國七十五年六月初版

經畧復國要編卷之八

與艾主事書

四月初一日

接手翰阻國王西行甚善近日朝中議者俱謂不宜
深入昨平壤數戰已足示威茲倭奴卑詞乞哀縱未
必真否而我假此縱歸朝鮮故土不失尺寸天朝兵
馬可以速還錢糧可以減省今彼國王徒欲報怨而
不修省徒欲中國煩師而不知兵連禍結反貽伊國
之害草此附復不盡

與李提督書

初二日

初八日清正如與行長同行彼既畏威我以恩結則

亦已矣倘彼無知獨留此地其為驕橫必所難容即當密諭全羅道截其歸路我兵嚴守津江一面馳報不佞即率劉綎新兵直至開城面與門下商確進剿之策收功全勝計在唾手間矣切勿倉卒致有疎虞

又初二日

昨朝鮮國王送謝疏揭帖并辯明帥臣受枉疏稿此出肺腑非吾儕所能強飾也二十九日遼東韓道至義州面述周巡按驗級時問人何以辯其為日本與朝鮮人有人稟稱朝鮮人有網痕日本人無網痕且無髮周巡按令畫工圖其形像每十級一排一一對

過內取一級令生倭辯認是那國人他寫日本二字
又於百級中取一級令生倭認亦寫日本二字直指
君大喜因云人言之誣至於如此若彼跡一上吾儕
報功之虛實不辯自明矣朝鮮齎跡人已在途不佞
恐門下垂念先以本國疏稿三本呈覽幸秘之

又 初三日

昨觀來札述清正與行長矛盾宜有之蓋清正挾二
王子三陪臣在彼且平壤戰挫彼又不與恃已之功
恨行長之專其情矛盾宜也但行長既行清正決不
敢留蓋前日併集勢衆今日倭歸勢孤前日聲勢相

倚且亟脫威鏡今日勢孤力屈何敢獨留縱使清正肯留而部下群倭亦必不從故不佞謂其必行者此也所可慮者吾使臣旗牌已遣而彼中王子陪臣不肯放還倭將不留數人門下須諭沈惟敬諸人三事一有不從即令諸人回還我境速知會全羅用心邀截我兵固守津江火速報知不佞即發劉綎新兵協助不佞亦親至開城共議進剿也萬勿倉卒應之設行長肯還王子陪臣肯留倭將而清正乃拘其中我則速遣智術之士間諜其中令之變動徐觀相持行事是一策也如行長意真肯留倭將而清正獨拘二

王子與陪臣又敢獨留王京則單放行長諸倭歸國
我則照前困守之法亦莫輕動以待不佞之來釜中
遊魚諒不能倖脫矣諸惟留神是望

移朝鮮國王咨

初四日

一為軍機事據委官通判王君榮稟稱職奉委前至
安興朝鮮王相遇於途俱在馬上講論久之王乃還
安興集群臣相見職以紙筆兼用口舌懇切曉勸自
未至酉累千餘言王意稍轉乃其群臣百餘人忽相
率跪階下齊聲號泣云誓不與賊俱生以致王堅執
必欲西往而懇進兵等因到部據此為照哲人待時

而動兵家相機而行本部奉命東援王國非謂專

於剿滅必將謀出萬全計圖決勝使王國危而復安
日本畏而懷德體天地生殺之機行聖王仁義之道
先是沈惟敬自倭中來願言通貢彼時非不欲許之
顧使數萬之衆寒月冬征裂膚墮指走千餘里而必
欲與倭一戰者何哉蓋以倭奴悖逆猖獗不一創懲
無以彰天朝之威無以雪王國之恥是以斷不許
貢矢志進兵者事機當如是也既而一戰下平壤再
戰下開城三戰碧蹄更復斬級非不欲乘此建瓴以
圖席捲盡滅醜類還王舊都於以築京觀於岳山洗

干戈於漢水為快心事也值天雨連綿稻畦泥濘暫
守開城以圖後舉而倭酋行長清正等近復樹白旗
哀詞懇貢願歸王子離王京即回日本夫當我勝彼
敗之時非不欲竟絕之而茲因搖尾遂起憐情者何
哉蓋以王國破殘之後人不得耕白骨委道旁黔黎
失家業陰風泣鬼晝日啼饑無論王國即天兵奮不
顧身為王戰鬪而死者遊魂渺渺血污難歸興言及
此不勝涕淚故本部與提督覲時相許者蓋以屈力
不若攻心畏威不若懷德且得因是而察其真偽之
情因是而覘其虛實之狀因是而探其糧食之有無

因是而識其衆心之進退與關白之援救或來與不
來此正用而示之不用能而示之不能守不攻而攻
必救藏九地而動九天王試思之如果一意許貢罷
兵不為王思善後之策則川兵何以後來海運何以
嚴督何以賑爾國之饑民何以修爾國之城塹李提
督何以更至開城中左右三營何以廣為分布也此
正陰符秘訣鬼神莫知恐王不察所以特令王通判
前來陳說乃王君臣忘遠慮急近功遺大憂逞小忿
一至於此不思二子未歸王京未復兵甲不完衆寡
不敵惟悻悻然欲 天朝之兵為爾國專事屠殺夫

倭固當誅時亦當審今天雨不常泥深陷膝車不得
方軌騎不得成列嵐氣薰蒸人多疾疫王試思之今
日進兵利耶不利耶果能盡滅使之無一生還否耶
此一戰果還王京歸王子否耶且窮寇勿追困獸猶
鬪彼衆猶數倍於我若請貢不成知無生理挑其精
銳用分番休迭之法東控漢江之南西截碧蹄之北
旁掠別道專守王京再求關白救援前來協助兵連
禍結曷有已時吾意王國封疆不至於喪亡不已也
王試思之今歲不得耕耒歲能足食否耶精壯今已
斃目下能生聚否耶昔以朝鮮八道敵倭而不足今

以偏安一隅迎敵而有餘否耶兵法謂十圍五攻不
若宜避王國君臣能知之否耶昔鄭伯肉袒牽羊而
存國越人卧薪嘗膽而復讐彼鄭豈不能背城以戰
而越必欲棲會稽之山誠以衆寡强弱有避無害袖
手旁觀躁妄輕率驅天朝士卒而不知惜視本國
人民土地荒蕪死亡而不知憐棄人倫逆天理陷二
子陪臣於賊中而不知返舉先王之江山社稷聽二
三群小播弄垂亡而不知悟藉援驅賊尚不知憐窮
恤困革故鼎新而猶哓哓於誓不共戴天之語為眼
前報復之圖王國之謀臣策士於茲見矣今陪臣既

能齊聲號泣必能同心協謀誓不與賊俱生必能扼賊於死本部奉命東來視師海上生殺之柄我得專之方將為王定百年不拔之基乃阻撓如此今當與王決一進止王若照舊堅執不以本部之言是聽本部與提督號令三軍控守臨津西岸任王君臣飭爾兵整爾卒與倭相搏本部當登句麗之峯望王國之軍容也為此咨請查照區畫速行回報

移朝鮮國王咨

初四日

一為隆獎忠勇事自倭奴摧陷朝鮮王國三都諸郡縣悉皆望風奔潰曾無一英雄傑士倡義師排大難

守封疆以圖恢復者更聞縱酒遊山賦詩挾妓置理
亂於不知付存亡於不較興言及此王國可謂無人
獨全羅道觀察使權慄扼守孤懸招集衆庶屢出奇
謀時抗大敵近復囊沙為糧誘倭來搶而刼殺之此
正王國板蕩忠臣中興名將本部深為加尚合先隆
獎懋賞勤勞除另行具題外今將發下絹八端白銀
五十兩獎賞本官以為忠勇者之勸王其加之爵祿
以風動本國僚宰仍申飭一應文武大小陪臣痛加
省惕除克雪恥盡如權慄毋再泄泄怠緩耽聲律而
忘武備合咨前去煩為查照差的當官役齎赴全羅

道權慄處表示本部隆獎至意取回文查考

檄朝鮮陪臣尹根壽

初十日

一為東征紀錄事朝鮮東方君子國也本部視師入境見江山形勝風俗淳熙固知可歌可咏况春底鶯花松間臺榭東征之感豈直楊柳依依而已哉漫述短章幸鐫木石以紀時事本部待班師之日當謁箕賢墓登牡丹峯別有所紀俟另發也

檄佟養正

十五日

一為禁約事近訪得東征將領家丁及軍兵等不守行伍擅自逃回或有關領錢糧一至軍前領畢仍自

私回或有各官縱令回家歇役有事方調前來事屬
違犯相應嚴禁牌仰本官即便委遣的當員役於鴨
綠江渡口把截除公差各員役外其餘有家丁軍兵
不許仍前令其私自往來前來者即便阻歸逃回者
即便拏解毋得容縱至如各商販前來朝鮮貿易者
查明放行不許一槩阻截如把江各員役有需索商
販財帛及因而生事者本部查訪的實定以軍法網
打一百棍然後究罪本官即將牌內事宜出示曉諭
由報

檄艾主政 十五日